

Pcd grischuna: Cleras parolas ed elecziuns

Cuss. dals stans Stefan Engler pro e cuss. naz. Magdalena Martullo-Blocher contra la lescha d'asil

■ (anr/gc) Cun 95 delegadas e delegads è la radunanza da la pcd grischuna a Cuira stada frequentada bain mesemna saira. Ina surpraisa per bainqualin è stà da vesair cuss. naz. Magdalena Martullo-Blocher sco referenta cunter la lescha federala d'asil. Ella n'ha dentant per blier betg cuntanschi il sustegn da la maiorità per sia proposta. En ses bainvegns ha il parsura, cuss. dals stans *Stefan Engler*, postulà la renovaziun creativa per il Grischun. L'aters basegnia i tant curaschi sco la forza da la populaziun. Noss chantun dovria ideas, investurs ed in ferm maun public.

En pietad è vegnì sa regurdà da cuss. naz. Toni Cantieni, mort dacurt. El è stà engaschà fitg sin plaun communal, federal, en il moviment rumantsch ed ha era g'è timunà cun success la pcd grischuna.

Midar la lescha federala d'asil

Marcel Sutter, schef da l'Uffizi per migraziun dal chantun Grischun, dilucidescha las grondas sfidas che tala muntia era per nos chantun. Già la cifra da ca. 60 milliuns fugitivs sin il mund ha impressiunà. En Svizra quintan ins cun 40 000 dumondas per asil. Il Grischun ha da surpigliar 2,7%. Da preschent èn quai en turn 1500 personas. Quest dumber vegnia dentant a crescer vinavant.

Tenor cuss. dals stans *Stefan Engler* n'èsi betg uschè lev da chattar per la problematica cun ils asilants schliaziuns. Ins vul dentant proceduras correctas. Surtut vai per accelerar talas efficientamain, dentant fairamain. Cun la lescha proponida sajan ins sin la dretga via. Segund



Cuss. naz. Magdalena Martullo-Blocher ha discursi cunter midar la lescha d'asil, cuss. dals stans *Stefan Engler* pro. MAD

cuss. naz. *Magdalena Martullo-Blocher*, ch'è cunter la nova lescha, dovria quai in maun ferm che veglia era schliar la problematica. Las leschas existentas bastian persuerter. Il dumber da fugitivs creschia considerablmain. Controllas severas als cunfins èn indispensablas. Ils custs per ils asilants s'augmentian sin milliardas. Ils emprims set onns vegnan els purtads da la confederaziun, suenter tras ils chantuns e las vischnancas. Accelerar la procedura na gidia nagut, siond ch'adina pli blers vegnian recepids e be in pitschen dumber giaja enavos. Cun 80:12 vuschs e trais abstenziuns s'exprima la pcd dal

Grischun per midar la lescha d'asil federala.

A favur dal servetsch public

Caterina Ventrici, presidenta da la pcd da la citad da Cuira, preschenta ils arguments cunter l'iniziativa federala «Pro servetsch public». I va per in provediment da basa (posta, traffic public e telecomunicaziun) ch'è da gronda impurtanza per il pajais. La populaziun spetga in tal per tut las regiuns. Tenor ils iniziants duessan las interpresas federalas – Swisscom, la Posta e las Viafiers federalas – n'avair nagina finamira da far gudogns

e nagins interess fiscals. Cun acceptar l'iniziativa vegness il servetsch public dentant pli debel. I dess pli paucas entradas per confederaziun che stuess reducir las prestaziuns ed augmentar la taglia.

La clera maiorità dals delegads decida perquai la parola na.

Finanziar gistamain il traffic public

Peter Portmann, che candidescha per il cussegl da la citad da Cuira, orientescha davart l'iniziativa pertutgant la finanziaziun gista dal traffic public.

L'iniziativa pretenda ch'èn l'avegnir vegnia l'entir retgav da la taglia sin car-

burants duvrà exclusivamain per il traffic sin via. Oz èsi la mesadad. L'autra po la confederaziun impunder per ulteriuras incumbensas. Ils meds vegness augmentads – tenor l'iniziativa – da 3,7 sin 5,2 milliardas. Quels 1,5 milliuns na stessan betg pli a disposiziun a la confederaziun. Quest manco stuess vegnir compensà.

La gronda maiorità da la pcd è cunter questa iniziativa.

Ulteriuras parolas

La supranza ha decidì las parolas pertutgant las duas ulteriuras votaziuns federalas dals 5 da zercladur. Unanimamain è ella cunter in'entrada da basa nuncundiziunada. Pertutgant la lescha concernent la medischna da reproducziun ha ella decidì – suenter ina discussiun contraversa – da dar liber la vusch.

Reelegi la supranza da la pcd chantunala

Sco president da la pcd grischuna è cuss. dals stans *Stefan Engler* vegnì confermà cun applaus per in'ulteriura perioda d'uffizi. La deputada *Silvia Casutt-Derungs* e deputà *Alessandro della Vedova* stattan vinavant a disposiziun per il vicepresidi. Dal directori fan part: Ils deputads *Livio Zanetti*, *Reto Cramer* e *Remo Cavegn* (ed ex-officio cuss. naz. *Martin Candinas*, cuss. guv. *Mario Cavigelli* e deputà *Marcel Caduff*, schef da la fracziun).

Sco revisurs da quint èn vegnids tshernids deputà *René Epp* e *Patric Vincenz* e sco suppleanta *Jeanette Bürgi-Büchel*, presidenta da las dunnas da la pcd.